



## PAGHOROP-HOROP

Rev. Fr. Luisito A. Occiano

Igwang kasabihan sa Ingles: *“God promised Christians a safe landing, not a smooth sailing”*. Minsan sa pagbiyahe, igwa kitang kaipuhan na agihan na lubak-lubak na tinampo. Alagad, kaipuhan agihan niato ini tanganing makaabot kita sa satong destinasyon na matiwasay.

An relasyon niato nakakabaing man sa sarong pagbaklay. Minsan makakasumpung kita nin tawo na nagtataong lubak-lubak sa satong dalan. Sinda garo mga *turbulence* sa biyahe kan eroplano. Mga kulog-payo sa buhay niato asin nagigin dahilan kan kaangotan asin paglilibak. Sa madaling sabi nagigin kawsa man kan dagdag niatong pagkakasala. Siguro maisip kita kun pwede sana kita na an magkontrol kan saindang isip nganing mapatama an saindang pagtaram o kaya saindang mga hiro.

An ebanghelyo niato ngonian na Domingo nagtatao nin linaw sa siring na problema.

An enot – an pagpamibi. Siring sa sarong aki, an enot niatong pinagsusumbungan kan satong problema iyo an satong magurang. Kun igwa kitang problema sa kapwa, isumbong niato sinda sa pamibi. Imbes na i-tsismis, iusip niato an satong kaiwal o nakakulog sato sa pamibi. Sa siring na paagi, mapaghurop-huropan niato an satong gigibohon sa sunod na lakdang. Asin makakahagad kita nin kusog boot asin kalinawan nin isip sa satong sasabihon sa sunod.

Nin huli an panduwa – an tamang urulay o fraternal correction. Dakul sa satong kinakaangotan dai man nagaaram kan saindang sala. Nin huli ta mayong nagtataram sinda, paghuna ninda tama an saindang ginigibo. Alagad kaipuhan kaini an deplomasya asin maray na kamawotan na makatabang. An tsismis o paglilibak, dai nungka makakatabang. Kun kaipuhan nin testigo o katuwang mas maninigong gibohon.

An pantolo iyo solusyon na dapat magdara sa matiwasay na relasyon. An pagpatawad (*reconciliation*) asin pagbalik sa dating maray na relasyon (*restoration*). Dakul na tawo nagsasabi, “pinatawad ko na yan”, pero pagnagkasabatan sa tinampo, dai man giraray nagtitinohan. Siguro kaipuhan nin panahon nin pag-omay tanganing mapag-adalan an pag-omay kan lugar kan kasalan.

Minsan masakit mangyari an tunay na pakikipagulian. Dai niato kayang kontrolon an isip asin boot kan satong kapwa. Alagad an satong sadiri pwede niato makontrol asin magpasensya. Asin pwede ining magtao sato nin adal asin leksyon.

Totoo, kaipuhan niatong magpangadie asin magpakumbaba. Padagos kitang magbabaklay sa manlaen-laen na dalan kan satong bakong perpektong relasyon. An importante, igwa kitang *“safe landing”* - makaabot kita gabos kaiba an satong namomotan – pati na an satong kinakaangotan - duman sa satong destinasyon, sa buhay na daing kasagkoran.

## RITO SA PAGPOON

### Introduccion

**C — “An Marhay na Relacion sa Kapwa.”**

Kita gabos magturugang ki Cristo bilang mga binonyagang Cristiano. Minamawot nin Kagurangnan na papagdanayon niato gabos an marhay na relacion sa lambang sarô tangaing orog na mapakusog an pagkaboronyog sa Simbahan. An dai nagtutubod satuya man na darahon sa sincerong pagbabâgo kan sadiri.

**Antifona sa Paglaog** (*S 118, 137. 124*)  
*(Sinasantambit kun mayo nin Awit sa Paglaog)*

**Matanos ka, Kagurangnan, asin tama an saimong paghukom; gibohon mo sa saimong sorogoon sosog sa pagkaherak mo.**

### Pataratara (*Tindog*)

**P —** Sa ngaran kan Ama, asin kan Aki, asin kan Espiritu Santo.

**B — Amen.**

**P —** An Kagurangnan mapasaindo.

**B — Asin sa saimong espiritu.**

### Gawe nin Pagsolsol

**P —** Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.  
*(Halipot na pagtoninong)*

**Gabos — Nagkukumpisal ako sa Dios na makakamhan, asin saindo, mga tugang, ta nagkasalâ ako nin makuri sa isip, sa tataramon, sa gibo, asin sa kapabayaan: salâ ko, salâ ko, makuring salâ ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Dios.**

**P —** Maherak man lugod sato an Dios na makakamhan asin, pakapatawada an satong mga kasâlan, darahon kita sa buhay na daing kasagkoran.

**B — Amen.**

### Kagurangnan, maherak ka

**P —** Kagurangnan, maherak ka.

**B — Kagurangnan, maherak ka.**

**P —** Cristo, maherak ka.

**B — Cristo, maherak ka.**

**P —** Kagurangnan, maherak ka.

**B — Kagurangnan, maherak ka.**

### Kamurawayan

**Gabos — Kamurawayan sa Dios sa kaitaasan asin sa daga katoninongan sa mga tawong marahay an boot. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatam mi ika huli kandakula mong kamurawayan, Kagurangnan na Dios, Hadeng**

langitnon, Dios Amang makakamhan. Kagurangnan Aking Bogtong, Jesu Cristo, Kagurangnan na Dios, Cordero kan Dios, Aki kan Ama, ika na nagpapara kan mga kasalan kan kinaban, kaheraki kami; ika na nagpapara kan mga kasalan kan kinaban, akua an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

## Colecta

**P** — Mamibi kita. (*Halipot na pagtoninong*)

O Dios, kaugaying hilinga an mga aki nin saimong pagkamoot, na huli kaini an pagtubos samo nagdatong asin an pagampon samo na-ootob, tanganing iwaras sa mga nagtutubod ki Cristo an tunay na katalingkasan asin an daing-tapos na pamana. Huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

**B** — Amen.

## LITURGIA NIN TATARAMON

### Enot na Babasahon

(Ezekiel 33, 7-9) (*Tukaw*)

*An patanid nin Dios iyo an pagmawot na ilikay an tawo sa karâtan.*

### Pagbasa sa Libro ni Profeta Ezekiel

Ini an sabi nin Kagurangnan: "Ika, Aki nin Tawo, ginibo kong bantay sa harong nin Israel. Kun ika makadangog nin tataramon na hale sa sakong nguso, ihatod mo sinda an patanid na gikan sako. Kun ako magsabi sa tawong tampalasan, 'O tampalasan, ika magagadan, asin dai mo pinatanidan an siring na tampalasan, na talikdan an saiyang maraot na gibo.' An siring na tawong tampalasan magagadan sa saiyang karâtan, asin an saiyang dugo sisingilon saimo. Alagad kun an tampalasan saimong patanidan na talikdan niya an saiyang maraot na gibo asin dai niya tinalikdan, siya magagadan sa saiyang karâtan, alagad ikinaligtas mo an saimong kalag."

An Tataramon nin Kagurangnan.

**Gabos** — **Salamat sa Dios.**

### Salmo Responsorio

(Salmo 95, 1-2. 6-7. 8-9)

**R** — **Kun nognian madangog nindo an saiyang tingog hare pagpatagasa an saindong mga puso.**

1. Madya, mag-awit kita sa Kagurangnan, ipag-ogma niato an gapo nin satong kaligtasan! Madya sa atubang niya asin magpasalamat, magpasalamat sa mga awit nin kaomawan. (**R**)
2. Madya, magsamba kita asin lumuhod, lumuhod sa atubang nin

Kagurangnan, satong Kaglalang! Siya an satuyang Dios, kita an banwaan na saiyang tinubos. (**R**)

3. Lugod dangoga nindo an saiyang tingog! Hare pagpatagasa an saindong puso, siring sa Meriba, siring kaidtong sa Massa sa kadlagan, kan ako pinagsugotan kan saindang mga magurang. (**R**)

### Ikaduwang Babasahon

(Roma 13, 8-10)

*Kamotan nindo an saindong kapwa siring kan pagkamoot nindo sa saindong sadiri. Kun gibohon nindo ini, sabi ni San Pablo inootob nindo an Tugon.*

### Pagbasa sa Surat ni San Pablo sa mga taga-Roma

Dai dapat magkaigwa nin pinagakautangan; gabos dapat na magkaminoonan. An namoot sa kapwa, nakautob kan Tugon. Dai magdorog sa bakong agom, dai maggadan, dai maghabon, dai maara asin iba pa. An gabos na tugon nabibilog sa sarong sanang tugon: Kamotan mo an kapwa siring kan pagkamoot mo sa saimo man sana, an pagkamoot dai nagpapakaraot sa kapwa; kaya an pagkamoot iyo an pinakaubod kan Tugon."

An Tataramon nin Kagurangnan.

**Gabos** — **Salamat sa Dios.**

### Pagrokyaw (*Tindog*)

(*Sinasambit kun dai inawit an Alleluia*)

**Alleluia! alleluia, alleluia! Magbantay asin mag-andam: dai nindo aram kun nuarin maabot an Aki nin Tawo. Alleluia!**

### Evangelio

(Mateo 18, 15-20)

*An Evangelio nagpapahayag satuya kan mensahe na an marhay na relacion sa kapwa importanteng marhay an pagmukna nin comunidad na an mga miembro nagkakasararô. Sa tunay na pagkasararô yaon an presencia nin Dios.*

**P** — Pagbasa kan Evangelio na Sinurat ni San Mateo.

**B** — **Kamurawayan saimo, Kagurangnan.**

Si Jesus nagsabi sa saiyang mga disipulos: "Kun an saimong tugang nagkasalâ saimo, padumanan mo asin kaolayon mo, kamo sanang duwa. Kun magdangog saimo, nadara mo an saimong tugang. Kun dai magdangog saimo, kumua ka nin sarô o duwa katawo, tanganing an bilog na kaso mahusay, asin mapatunayan nin duwa o tolong saksi. Kun dai magdangog sinda, ipaisi mo sa comunidad; ibilang mo na pagano o publicano. Totoong sinasabi ko saindo, 'An gapuson nindo sa daga, gagapuson man sa langit, asin an hubadan nindo sa daga, huhubadan man sa langit.' Kun duwa sa saindo nagkaoyon kun ano an hahagadon, itatao saindo nin sakong Ama sa langit; huli ta kun saen duwa o tolo na nagkakatiripon sa ngaran ko, yaon ako sa tahaw ninda."

**P** — An Marahay na Baretâ nin Kagurangnan.

**B** — **Pag-omaw saimo Cristo.**

## Homilia (*Tukaw*)

### Pagrokyaw kan Pagtubod (*Tindog*) Credo Niceno-Constantinopolitano

**Gabos** — Nagtutubod ako sa sarong Dios Amang makakamhan, kaggibo kan langit asin daga, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bago kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saros a pagka-Dios sa Ama: huli saiyang nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(*Sa mga minasunod na tataramon, abot sa asin nanitawo, an gabos minaduko.*)

Asin nani-laman huli kan Espiritu Santo ki Virgen Maria, asin nanitawo. Ipinako pa sa cruz para sato kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat sosog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa saro, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasalan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

### Pamibi nin Banwaan

**P** — Dios nin pagkamoot, linalang mo an tawo asin boot mon a sinda mamoot sa lambang sarô. Madya samo mantang iniitas mi sa saimong atubang an samong kahagadan.

**R** — **Kagurangnan, hinanyoga an samong pamibi.**

1. Para sa mga namamayo nin Simbahan, tanganing sa saindang mga paarog nin pagkamoot asin paglingkod, magdanay an katoninongan asin an pagpatarabang-tabang: mamibi kita sa Kagurangnan. (**R**)
2. Para sa mga naglilingkod sa comunidad asin mga organizacion, tanganing an karahayan kan lambang nangangaipo magin saindang inspiracion asin kamawotan: mamibi kita sa Kagurangnan. (**R**)
3. Para sa mga naghehelang, inaapi asin pinapasakitan, tanganing an pagkamoot asin marhay na pagiribahan magin dalan kan saindang kaomayan asin kaogmahan: mamibi kita sa Kagurangnan. (**R**)

4. Para sa mga nasa pag-iriwal tanganing sinda magkasarabotan, asin an pagkamoot na yaon ki Jesu Cristo magdanay sa puso kan lambang sarô: mamibi kita sa Kagurangnan. (R)

**P** — Ama, pakusoga kami asin sa samuyang mga isip asin puso manuparan mi lugod an saimong balaog. Huli ki Cristo samong Kagurangnan.

**B** — Amen.

## LITURGIA NIN EUCARISTIA

### Ofertorio (*Tukaw*)

(*Kun dai inaawit an Awit sa Pagdolot*)

**P** — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan daga asin kan gibo kan mga kamot nin mga tawo, ini magigin para samo tinapay nin buhay.

**B** — Pag-omawon an Dios sagkod pa man.

**P** — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

**B** — Pag-omawon an Dios sagkod pa man.

**P** — (*Tindog*) Magpamibi kamo, mga tugang: tanganing an sako asin an saindong atang maako man lugod kan Dios amang makakamhan.

**B** — Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.

### Pamibi sa mga Dolot

**P** — O Dios, ginigikanan nin tunay na pagkamoot asin katoninongan, itugot mo, namimibi kami, na huli kaining atang, maninigo kaming magsamba kan saimong kadakulaan, asin huli kan pakisumaro sa banal na misterio, maimbod kaming magkasararô sa boot. Huli ki Cristo samong Kagurangnan.

**B** — Amen.

### Prefacio VIII sa mga Domingo kan Ordinariong Panahon

An pinagsarong simbahan gikan sa pagkasararô kan Trinidad

**P** — An Kagurangnan mapasaindo.

**B** — Asin sa saimong Espiritu.

**P** — litaas an mga puso.

**B** — Initaas mi na sa Kagurangnan.

**P** — Magpasalamat kita sa Kagurangnan, satuyang Dios.

**B** — Maninigo asin Dapat.

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Ama, Dios na makakamhan na daing kasagkoran huli ki Cristo samong Kagurangnan:

Ta an mga aki, na harayong isiniblag kan crimen nin kasâlan, binoot mong tiriponon giraray saimo huli kan dugo kan Aki mo asin sa bagsik kan Espiritu, tanganing an banwaan na nabilog sa pagkasarô kan Trinidad, para sa kaomawan kan manlaen-laen mong katonongan, mamidbidan na Simbahan, Hawak ni Cristo asin templo kan Espiritu.

Kaya kairiba kan mga koro nin mga angeles nag-oomaw kami saimo, maogmang nagpapahayag nin pagtubod:

**Gabos** — Banal, Banal, Banal an Kagurangnan Dios ni mga Hukbo. An langit asin daga pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

### Pamibi sa Eucaristia (*Luhod*)

**P** — Misterio kan Pagtubod.

**B** — An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.

**P** — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

**B** — Amen.

## RITO SA PAGCOMUNION

### Ama Niamo (*Tindog*)

**P** — Natukduan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

**Gabos** — Ama niamo, na yaon sa langit: pabanalon an ngaran mo; magdatong an kahadean mo; mangyari an boot mo sa daga nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

**P** — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

**B** — Huli ta saimo an kahadean, asin an kapangyarihan, siring man an kamurawayan sa mga kapanahonan.

**P** — Jesu Cristong Kagurangnan, ika na nagsabi sa saimong mga Apostoles: Katoninongan iwinawat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog sosog sa saimong kabotan. Ika na

nabubuhay asin naghahade sa kapanahonan kan mga panahon.

**B** — Amen

### Pagpahayag kan Katoninongan

**P** — An katoninongan kan Kagurangnan danay na mapasaindo.

**B** — Asin sa saimong espiritu.

**P** — Magpatinaraohan kamo nin Katoninongan

### Cordero

**Gabos** — Cordero kan Dios, na nagpapara kan mga kasâlan kan kinaban: kaheraki kami. Cordero kan Dios, na nagpapara kan mga kasâlan kan kinaban: kaheraki kami. Cordero kan Dios, na nagpapara kan mga kasâlan kan kinaban: tawi kami nin katoninongan.

### Pag-alok sa Pagcomunyon (*Luhod*)

**P** — Uya an Cordero kan Dios, uya an nagpapara kan mga kasâlan kan kinaban. Paladan an mga inapod sa pamanggi kan Cordero.

**Gabos** — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

### Antifona sa Comunyon (*Jn 8, 12*)

(*Sinasambit kun mayong Awit sa Comunyon*)

Ako an ilaw nin kinaban, olay kan Kagurangnan; an nagsusunod sako, dai naglalakaw sa kadikloman, kundi magkakaigwa kan liwanag nin buhay.

### Pamibi Pakacomunyon (*Tindog*)

**P** — Mamibi kita. (*Halipot na pagtoninong*)

Kagurangnan, itugot mo samong mga paratubod mo, na pinapakakan asin binubuhay mo sa kakanon nin saimong Tataramon asin langitnon na Sacramento, na magkamit na gayo kan mga dakulang atang kan Aki mong namomotan, tanganing danay kaming magkanigo na makisumaro sa saiyang buhay. Siya na nabubuhay asin naghahade sa kapanahonan kan mga panahon.

**B** — Amen.

### Pamibi sa Ikalimang Aldaw kan Novena ki Divino Rostro (*Luhod*)

**Gabos** — Maugayon na Kagurangnan, naglibot ka sa bilog na rona nin Judea sa pag-otob kan kabotan nin Ama. Kadakul an nakahiling Saimo asin nakadagong kan Saimong mga katukdoan. Kadakul an naomayan kan saindang mga kahelangan huli kan Saimong pagkaherak. Maomayan man lugod kami sa kahelangan nin samong hawak asin kalag na iyo an samong kasalan. Lugod madagong mi an Saimong katukdoan asin maka-otob kami sa Saimong kabotan. Tanganing sa huring aldaw mahiling mi an Saimong banal na lalawgon. Hinanyoga an samong mga kahagadan asin kamawotan sa novenang ini kun iyan para man sa Saimong kamurawayan asin para man sa karahayan nin samong kalag. Amen.

## Oratio Imperata (Luhod)

Gabos — Dios na samong Ama, minadulok kami saimong pangangaipo. Hinahagad mi saimong pagligtas samo tumang sa pandemia kan Corona Virus na naglalakop ngonian asin nagdadara nin kagadanan.

Minahagad kami kan saimong tabang para sa mga tawong naghingowa sa pag-adal kan hinalean, kan hiro, asin paglakop kainang pandemia. Giyahan mo an mga kamot asin isip kan mga experto sa salud tangani na sinda man makatabang nin may maninigong kakayahan asin pagmakulog sa mga may helang.

Ipinapamibi man niamo an mga naglilingkod sa banwaan, sa gobyerno asin pribadong agencia, tangani na makahanap sinda nin bulong sa helang na dara kainang pandemia. Ipinapamibi mi man an mga tinamaan na kan helang. Sinda man lugod maumayan tulos. Tawan mo kami ni biyaya na maghingowa para sa karahayan kan gabos asin sa mga nagsasakit.

Ini hinahagad mi huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios sa kapanahonan kan mga panahon. Amen.

Divino Rostro, Kaheraki kami.

Nuestra Señora de Peñafrancia, Ipmamibi mo kami.

## RITO SA PAGTATAPOS

### Solemneng Bendicion (Tindog) Ordinariong Panahon II

**P** — An Kagurangnan mapasaindo.

**B** — Asin sa saimong espiritu.

**P** — Iduko an saindong mga payo asin mamibi para sa bendicion nin mahal na Dios. (Halipot na pagtoninong)

An katoninongan nin Dios na dai matugkad kan isip nin tawo, magdanay sa saindong mga puso asin isip, sa pagkamidbid asin pagkamoot sa Dios asin sa saiyang Aki, si Cristo na satong Kagurangnan.

**P** — Bendicionan kamo kan Dios na makakamhan: an Ama, asin an Aki, ✠ asin an Espiritu Santo.

**B** — Amen.

**P** — Lakaw kamo sa katoninongan ni Cristo.

**B** — Salamat sa Dios!



sambanwá

## GIYA SA PAGMISA SA SEMANA

### Septiembre 7, Lunes

Ika-anom na Aldaw kan Novena ki Divino Rostro, *Pula*

Misa — Misa Novenario ki Divino Rostro.

Mga Babasahon — 1 Cor 5:1-8 | S 5:5-6. 7. 12 | Lc 6:6-11

### Septiembre 8, Martes

Kafiestahan kan Pagkamundag ni Santa Mariang Virgen, *Puti*

Misa — Hilingon sa Misal Romano sa Bicol: Propio nin mga Santos asin Santas

Mga Babasahon — Mik 5:1-4 o Roma 8:28-30 | S 13:6. 6 | Mt 1:1-16. 18-23 o Mt 1: 18-23

### Septiembre 9, Miercoles

Ika-walong Aldaw kan Novena ki Divino Rostro, *Pula*

Misa — Misa Novenario ki Divino Rostro.

Mga Babasahon — 1 Cor 7:25-31 | S 45:11-12. 14-15. 16-17 | Lc 6:20-26

### Septiembre 10, Jueves

Ika-siyam na Aldaw kan Novena ki Divino Rostro, *Pula*

Misa — Misa Novenario ki Divino Rostro.

Mga Babasahon — 1 Cor 8:1-7. 11-13 | S 139:1-3. 13-14. 23-24. | Lc 6:27-36

### Septiembre 11, Viernes

KAFIESTAHAN NI DIVINO ROSTRO, (Misa paka-aga), *Pula*

Misa — Hilingon sa Mga Misa sa Kaomawan ni Divino Rostro.

Mga Babasahon — Isa 52:13-15. 53:1-5 | S 80: 1. 15-16. 18-19 | Fil 2:5-11 | Jn 19:17-27

Enot na Aldaw kan Novena ki Nuestra Señora de Peñafrancia, (Misa pakahapon), *Puti*

Misa — Hilingon sa Mga Misa sa Kaomawan ni Nuestra Señora de Peñafrancia.

Mga Babasahon — Sir 3:2-6. 12-14 | S 128:1-2. 3. 4-5 | Lc 2:41-52

### Septiembre 5, Sabado

Enot na Aldaw kan Novena ki Nuestra Señora de Peñafrancia, *Puti*

Misa — Hilingon sa Mga Misa sa Kaomawan ni Nuestra Señora de Peñafrancia.

Mga Babasahon — Gen 3:9-15. 20 | 1 Sam 2:1. 4-5. 6-7abcd | Mt 1:1-16. 18-21

## SCHEDULE OF LIVE SUNDAY MASSES

facebook.com/ArchdioceseOfCaceres | youtube.com/c/ArchdioceseOfCaceres

06:00 am	<b>FIFTH NOVENA MASS IN HONOR OF THE DIVINO ROSTRO</b> Rev. Fr. Jhun R. Oliva Parochial Vicar, Old Shrine and Parish of Our Lady of Peñafrancia
09:00 am	<b>SUNDAY MASS FOR THE "SEASON OF CREATION"</b> Most Rev. Rolando J. Tria Tirona, OCD, DD Archbishop of Caceres
05:30 pm	<b>FIFTH NOVENA MASS IN HONOR OF THE DIVINO ROSTRO</b> Rev. Fr. Joey D. Gonzaga Rector, Holy Rosary Major Seminary

## GIYA SA PAGSAMBA KAN BANWAAN NIN DIOS

Ika-XXI Domingo kan Ordinariong Panahon • 23 Agosto 2020

**MOST REV. ROLANDO J. TRIA TIRONA, OCD, DD**, Arzobispo kan Caceres  
**REV. FR. LUISITO A. OCCIANO**, Direktor, Caceres Commission on Communications  
**REV. FR. GLENN C. RUIZ**, Direktor, Commission on Liturgy  
**REV. FR. ERIC P. BOBIS**, In-Charge, Social Media  
**JOHN PAUL M. AVEN** asin **JUAN CARLOS R. MADRID**, Mga Editor

Hinimo asin inandam kan Archdiocesis kan Caceres, sa pangengenot kan Caceres Commission on Communications, asin Commission on Liturgy. Ciudad nin Naga, Pilipinas • 2020